

唐圭璋編

全宋

詞

第十四冊

國立編譯館

全宋詞卷二百二十一

吳淵 六首

吳潛 一百十五首

吳淵

淵字道夫號退庵德清人父柔勝祕閣修撰自寧國徙居嘉定七年進士第累官直煥章閣知平江府以樞密副都承旨知江州遷太府少卿加集英殿修撰知鎮江太平州隆興府歷江西安撫使陞兵部尚書進端明殿學士江東安撫使拜資政殿大學士封金陵公徙知福州福建安撫使予祠起拜參知政事卒贈少師諡莊敏有退庵集

念奴嬌

我來牛渚聊登眺客裏襟懷如豁誰著危亭當此處占斷古今愁絕江勢鯨奔山形虎踞天險非人設向來舟艦曾掃百萬胡羯追念照水然犀男兒當似此英雄豪傑歲月恩恩留不住鬢已星星堪鑷雲暗江天煙昏淮地是斷魂時節欄干槌碎酒狂忠憤俱發

水調歌頭

太白已仙去詩骨此山藏胸中錦繡如屋都乞與東皇碎翦杏花千樹濃抹胭脂萬點妖艷斷人腸曉露沐春色晴日漲風光孤村路逢休暇共徜徉酒旗斜處□□一簇幾紅妝暫息江頭烽火無奈鬢邊霜雪聊復放疏狂倚俟玉壺竭未肯寶鞭揚

沁園春 壽弟相國

喜我新歸逢戎初度關情更深正晝掩柴扉□尋隱遯□舒槐府戎正經綸白石清泉紫樞黃閣□□□□□□□□弟爲宰相兄作閒人南園借我登臨都不怕近前丞相瞋但曳履扶筇堪憐獨步攜壺載酒每歎孤斟七袞開顏六句屈指風雨對牀頻上心殷勤祝道何時回首及早抽身

又梅

十月江南一番春信怕憑玉欄正地連邊塞角聲三弄人思鄉國愁緒千般草草村墟疏疏籬落猶記花閒曾卓庵茶甌罷問幾回吟繞冷淡相看堪憐影落溪南又月午無人更漏三雞虛林幽

整數枝偏瘦已存鼎甌一點微酸松竹交盟雪霜心事斷是平生

不肯寒林逋在倩詩人此去爲語湖山以上朱本退庵詞四首

滿江紅烏衣

投老未歸太倉粟尙教蠶食家山夢秋江漁唱晚風牛笛別墅風
流慙莫新亭老淚空成滴笑當年君作主人翁同爲客 紫燕泊
猶如昔青鬢改難重覓記攜手同遊此處恍如前日且更開懷尋
樂事可憐過眼成陳迹把憂邊憂國許多愁權拋擲

又雨花臺用弟履齋烏衣園韻

秋後鍾山蒼翠色可供餐食登臨處怨桃舊曲催梅新笛江近蘋
風隨汛落峯高松露和雲滴歎頭童齒豁已成翁猶爲客 老懷
抱非疇昔歡意思須尋覓人閒世假饒百歲苦無多日已沒風雲
豪志氣祇思煙水閒蹤迹問何年同老宛溪濱漁釣擲以上朱本据景定建康志

補遺
二首

吳潛

潛字毅夫號履齋德清人淵弟嘉定十年進士第一淳祐十一年爲參知政事拜右丞相兼樞密使封慶國公判寧國府還祖籍改封許國公以沈炎論劾謫化州團練使循州安置卒贈少師有履齋詩餘

滿江紅送李御帶琪

紅玉塔前問何事翩然引去湖海上一汀鷗鷺半帆煙雨報國無
門空自怨濟時有策從誰吐過垂虹亭下繫扁舟鱸堪煮 捋一
醉留君住歌一曲送君路徧江南江北欲歸何處世事悠悠渾未
了年光冉冉今如許試舉頭一笑問青天無語

又送陳方伯上襄州幕府

露驛星程又還控西風征轡原自有孔璋書檄元龍豪氣蜀道尙
驚鼙鼓後神州正在干戈裏佐元戎一柱穩擎天裏之水 功名
事山林計人易老時難值看新絲一髮甚吾衰矣轉首從游十五
載關心契闊三千里便秋空邊雁落江南書來未

又齊山繡春臺

十二年前曾上到繡春臺頂雙腳健不煩筇杖透巖穿嶺老去漸
消狂氣習重來依舊佳風景想牧之千載尙神游空山冷 山之

下江流永江之外淮山暝望中原何處虎狼猶梗句蠹規模非淺
近石苻事業眞俄頃問古今宇宙竟如何無人省

又豫章滕
王閣

萬里西風吹我上滕王高閣正檻外楚山雲漲楚江濤作何處征
帆木末去有時野鳥沙邊落近簾鉤暮雨掩空來今猶昨 秋漸
緊添離索天正遠傷飄泊歎十年心事休休莫歲月無多人易
老乾坤雖大愁難著向黃昏斷送客魂消城頭角

又金陵烏
衣園

柳帶榆錢又還過清明寒食天一笑滿園羅綺滿城簫笛花樹得
晴紅欲染遠山過雨青如滴問江南池館有誰來江南客 烏衣
巷今猶昔烏衣事今難覓但年年燕子晚煙斜日抖擻一春塵土
債悲涼萬古英雄迹且芳尊隨分趁芳時休虛擲

又和呂居仁侍郎
東里先生韻

擬卜三椽問何處水迴山曲朝暮景清風當戶白雲藏屋更得四
時瓶貯酒未輸一品腰圍玉待千章手種木成陰周遮綠 且休

殢陶令菊也休羨子猷竹算百年一夢誰榮誰辱喚客烹茶閒話
了呼童取枕佳眠足但晨香一炷願天公時豐熟

又寄趙文仲南仲
鎮淮東帥憲

嶽后湘靈會孕箇擎天人物臨古峴綸巾羽扇笑驅胡羯護塞十
年高叔子出師一表儕諸葛有孤忠分付與佳兒眞衣鉢 劉家
驥馳空闊薛家鳳飛橫絕比君家兄弟可能豪傑草木聲名如電
掃氈裘心膽開風折待安排江漢一篇詩歸來說

又

細閱浮生爲甚底區區碌碌算只是信緣隨分早尋歸宿造物小
兒忺簸弄翻雲覆雨難撥觸謾一堆歲月鬢邊來跳丸速 田二
頃非無粟官四品非無祿更不知足後待何時足恰好園池原自
有近來新創三椽屋且飢時喫飯困時眠平爲福

又送吳叔
永尚書

舉世悠悠何妨任流行坎止算是處鮮魚羹飯喫來都美暇日扁
舟清雪上倦時一枕薰風裏試回頭堆案省文書徒勞爾 南浦

路東溪水離索恨飄零
意況星星鬢影近來如此萬事儘由天倒
斷三才自有人撐抵但多吟康節醉中詩頻相寄

又九日
郊行

歲歲登高算難得今年美景盡斂卻雨
霾風障霧沈雲暝遠岫四
呈青欲滴長空一抹明於鏡更天教老子放眉頭邊烽靜
數本
菊香能勁數朶桂香尤勝向尊前一笑幾多清興安得便如彭澤
去不妨且作山翁醕儘古今成敗共興亡都休省

又禾興月波樓
和友人韻

日薄寒空正澤國一汀霜葉過萬里西風塞雁數聲哀咽耿耿有
懷天可訊悠悠此恨誰能說倚闌干老淚落關山平蕪隔
提短
劍腰長缺昔壯志今華髮有江湖征棹水雲深闊要斬鼙鼉埋九
地可憐烏兔馳雙轍羨渠儂健筆掃磨崖文章別

又和吳季永
侍郎見寄

乍雨還晴正輕暖輕寒簾幕時悵望故人煙水鷺翻鷗落老去可
堪離恨結新來轉覺吟情薄況等閒客裏送年華成揮霍
天一

顧西南角人萬里風埃闊笑長卿歸蜀錦衣徒著不是等閒螳臂
怒也休剛道雞聲惡但千年往事誤平涼今番莫

又劉長翁右
司席上

癡靄頑陰風掃盡安排今夕便放出一輪金鏡皎然虛碧照徹肺
肝明似水是中空洞無他物倚亭皋搔首問天公天應識
人共
景都非昔君共我俱成客且相逢一笑笙歌簫笛老去可憐杯酒
減醉來謾把闌干拍便明朝煙水挂征帆還相憶

又姑蘇靈巖
寺涵空閣

客子愁來閒信馬到涵空閣誰爲我斂雲收霧青天爲幕八萬頃
湖如鏡靜波神護斷東南角望孤帆杳杳度微茫山邀卻
三塞
外紛狐貉三徑裏悲猿鶴笑鷗夷老子占他頭著正使百年能幾
許看來萬事難描摸問吳王池館復何如霜楓落

又梅

試馬東風且來問南枝消息正小墅幾株斜倚數花輕拆自有山
中幽態度誰知世上眞顏色歎君家五嶺我雙溪俱成客
長塞

管孤城笛天未曉人猶寂有幾多心事露清月白好把寒英都放了莫教春訊能占得問竹籬茅舍景如何惟渠識

又京口鳳凰池和蘆川春水
連天靚池蘇魏公舊游也

借問如何春能好客懷偏惡消遣底閒言閒語近都慵作歲月從今休點檢江湖自古多流落倚危亭目斷野雲邊孤舟泊人事改人情薄退後步爭先著且開尊洗琰爲君斟酌拂拭鳳凰池上景淒涼猿鶴山中約更東陽憔悴到腰圍渾如削

哨徧
亭記

在晉永和癸丑暮春初作蘭亭會集衆賢臨峻嶺崇山有茂林修竹流水暢幽情縱無管絃絲竹一觴一詠佳天氣於宇宙之中游心騁目此娛信可樂只念人生相與放形骸或一室晤言襟抱開靜躁雖殊當其可欣不知老至然倦復何之情隨事改悲相係俯仰閒遺迹往往俱成陳矣況約境變遷終期於盡修齡短景都能幾謾古換今移時消物化痛哉莫大生死每臨文弔往一興嗟亦自悼不能喻於懷算彭殤妄虛均爾今之視昔如契後視今猶

昔故聊敘錄時人所述慨想世殊事異後之來者覽斯文將悠然有感於此

水調歌頭
山焦

鐵甕古形勢相對立金焦長江萬里東注曉吹捲驚濤天際孤雲來去水際孤帆上下天共水相邀遠岫忽明晦好景畫難描混隋陳分宋魏戰孫曹回頭千載陳迹癡絕倚亭皋惟有汀邊鷗鷺不管人閒興廢一抹度青霄安得身飛去舉手謝塵囂

又雷川
溪亭

皎月亦常有今夜獨娟娟浮雲萬里收盡人在水晶匳矯首銀河澄澈搔首金風浩蕩毛髮亦冷然宇宙能空闊磨礪正迴旋倩漁翁撐舴艋柳陰邊垂綸下餌須臾釣得兩三鮮喚客烹魚釀酒伴我高吟長嘯爛醉卽佳眠何用驂鸞去已是地行仙

又送趙文
仲龍學

宛水纔停棹一舸又澄江巖花籬藥開徧時節正重陽喚起沙汀漁父攬取一天秋色無處不瀟湘有酒時鯨吸醉裏是吾鄉濟

時心憂國志問穹蒼是非得失成敗何用苦論量年事飛鳥奔兔
世事崩崖驚浪此別意茫茫但願身強健努力報君王

又送叔永
文昌

纔惜季方去又更別元方驚心天上雙鳳接翅下高岡萬里瞿塘
煙浪一片昭亭雲月渺渺正相望夜雨連風壑此意獨淒涼 杜
鵑聲猶不住攪離腸黃雞白酒吾亦歸興動江鄉人事紛紛難料
世事悠悠難說何處問穹蒼肯落兒曹淚一笑付滄浪

又江淮
一覽

勳業竟何許日日倚危樓天風吹動襟袖身世一輕鷗山際雲收
雲合沙際舟來舟去野意已先秋很石癡頑甚不省古今愁 郝
兵強韓艦整說徐州但憐吾衰久矣此事恐悠悠欲破諸公磊塊
且倩一杯澆醉休要問更籌星斗闌干角手摘莫驚不

沁園春
多景樓

第一江山無邊境界壓四百州正天低雲凍山寒木落蕭條楚塞
寂寞吳舟白鳥孤飛暮鴉羣注煙靄微茫鎖戍樓凭闌久問匈奴

未減底事菟裘 回頭祖敬何劉曾解把功名談笑收算當時多
少英雄氣概到今惟有廢壠荒丘夢裏光陰眼前風景一片今愁
共古愁人閒事盡悠悠且且莫莫休休

又江西
道中

落雁橫空亂鴉投樹孤村暮煙有漁翁拖網牧童戴笠行從水畔
唱過山前雨閣還垂雲低欲墮何處行人喚渡船蕭蕭處更柴門
草店竹外松邊 悽然倚馬停鞭歎客袂征衫歲月遷既不緣富
貴功名繫絆非因妻子田宅縈牽只有寸心難忘斯世磊塊輪囷
知者天愁無奈且三杯濁酒一枕酣眠

賀新郎
送吳季永侍郎

說著成淒楚正塵飛岷峨灩澦兔嘯狐舞頗牧禁中留不住彈壓
征西幕府便一舸月汀煙渚四塞三關天樣險問何人自關關
路成敗事幾今古 荼蘼芍藥春將暮最無情飄零柳絮攪人離
緒屈指秋風吹雁信應憶西湖夜雨謾歲月消磨如許上下四方
男子志肯臨歧昵昵兒曹語呼大白爲君舉

又吳中韓氏滄浪亭和吳夢窗韻

撲盡征衫氣小夷猶尊疊杖履踏開花事邂逅山翁行樂處何似
烏衣舊里歎芳草舞臺歌地百歲光陰如夢斷算古今興廢都如
此何用灑兒曹淚江南自有漁樵隊想家山猿愁鶴怨問人歸
未寄語寒梅休放盡留取三花兩葉待老子領些春意皎皎風流
心自許儘何妨瘦影橫斜水煩翠羽伴醒醉

又寓言

可意人如玉小簾櫳輕勻淡泞道家裝束長恨春歸無尋處全在
波明黛綠看冶葉倡條渾俗比似江梅清有韻更臨風對月斜依
竹看不足詠不足曲屏半掩青山簇正輕寒夜來花睡半敲殘
燭縹緲九霞光裏夢香在衣裳賸馥又只恐銅壺聲促試問送人
歸去後對一匳花影垂金粟腸易斷倩誰續

又用趙用父左司韻送鄭宗丞

又是春殘去倚東風寒雲淡日墮紅飄絮燕社鴻秋人不問儘管
吳笙越鼓但短髮星星無數萬事惟消彭澤醉也何妨袖捲長沙

舞身與世只如許闌干拍手閒情緒便明朝蒼鷗白鷺北山南
浦笑指午橋橋畔路簾幕深深院字尙趁得柳煙花霧我亦故山
猿鶴怨問何時歸棹雙溪渚歌一曲恨千縷

又寄趙南仲端明

煙樹瓜洲岸旌旗獵獵搖空故人天遠不似沙鷗飛得渡直到
雕鞍側畔但徙倚危闌目斷自古鍾情須我輩況人間萬事思量
徧濤似雪風如箭揚州十里朱簾捲想桃根桃葉依稀舊家庭
院誰把青紅吹到眼知有醉翁局段便回首舟移帆轉渺渺江波
愁未了正淮山日暮雲撩亂酒殘倚歌扇

又感春

笑口開能幾把年年芳情冶思總拋閒裏桃杏枝頭春纔半寒食
清明又是但歲月飄飛川逝回首秦樓雙燕語到如今目斷斜陽
外將往事試重記香羅尙有相思淚算人生新愁易積舊歡難
繼水上流紅無覓處還隔關山萬里但贏得新來憔悴昨夜東風
顛狂後想餘芳盡是飄零底詞寫就倩誰寄

滿庭芳春感

漠漠春陰疏疏春雨鷓鴣喚起春眠小園人靜獨自倚鞦韆又見
飄紅墮雪芳徑裏都是花鈿年年事閒愁閒悶挂在綠楊邊尋
思都徧了功名竹帛富貴貂蟬但身為利鎖心被名牽爭似依山
傍水數椽外二頃良田無縈絆炊粳釀秫長是好花天

又西湖

春水溶溶春山漠漠淡煙淺草輕籠危樓闌檻掠面小東風又是
飛花落絮芳草暗萬綠成叢閒徙倚百年人事都在畫船中故
園無恙否一溪翠竹兩徑蒼松更有魚堪釣有秫堪舂底事塵驅
物役空回首社燕秋鴻功名已蕭搔短髮分付與青銅

醉江月瓜洲會趙南仲端明

紅塵飛騎報元戎小隊踏青南陌雪浪堆邊呼曉渡吳楚半江分
拆歲月驚心風埃眯目相對頭俱白楊花撩亂可憐如此春色
誰道燕燕鶯鶯多情猶自認得年時客重唱江南腸斷句爲我滿
傾雲液畫鼓舫移金鞍人遠一餉煙波隔斜陽冉冉依然無限悵

側

又梅

曉來窗外正南枝初放兩花三葉千古春風頭上立羞退穠桃繁
李姑射神游壽陽妝褪色界塵都洗竹扉松戶平生所寄聊耳
堪笑強說和羹此君心事指高山流水隴驛淒涼卻怕被哀角城
頭吹起此處關情爲他凝竚淡月清霜裏巡檐何事歲寒相誓而
已

又暇日登新樓望揚州於雲煙縹緲之間寄趙南仲端明

半空樓閣把江山圖畫一時收拾白鳥孤飛飛盡處最好暮天秋
碧萬里西風百年人事謾倚闌干拍凝眸何許揚州煙樹歷歷
應念老子年來浮名浮利已作虛空擲三徑纔尋歸活計又是飄
零爲客回首平生驚心雙鬢容易成悽惻尊前一笑且由醉帽敲
側

八聲甘州和魏鶴山韻

任渠儂造物自兒嬉安能止吾歸有秋來竹徑春時花塢夏裏荷

漪何事東塗西抹空遺鬢毛稀矯首看鴻鵠遠舉高飛 點檢人閒今古問誰爲羸局底是輸基謾區區成敗蟻陣與蝸圍便掀天捲地勦業怕山中拍手笑希夷如何是一尊相屬萬事休知

又 壽吳叔永文
昌李永侍郎

記高岡兩鳳攬朝暉翩翻萬里來向槐廳深處松廳緊裏卻立徘徊一舸風帆煙浪擬豎錦江桅聊爲玄暉老共拂塵埃 我亦歸來巖壑正不妨散誕笑口頻開算人閒成敗何用苦驚猜便江南求田問舍把歲寒三友一園栽今宵酒只消鯨吸不要論杯

二郎神

小樓向晚正柳鎖一城煙雨記十里吳山繡簾朱戶曾學宮詞內舞浪逐東風無人管但脈脈歲移年度嗟往事未塵新愁還織怎堪重訴 凝竚問春何事飛紅飄絮縱杜曲秦川舊家都在誰寄晉書說與野草淒迷暮雲深黯渾自替人無緒珠淚滴應把寸腸萬結夜帷深處

解連環

綵橈芳苑嗟東風夢斷燕殘鶯嬾謾記得標格精神正雲漲暮天雨荒閒館嫩綠殷紅但回首一川波暖想嬌情慧態倚褪淡妝畫樓簾捲 吳歌數聲冉冉料移商變羽人共天遠須信道飛絮游絲儘春去春來景色偷換掃罷蠻牋難寄我濃愁深怨且如今問龜問卜望伊意轉

漢宮春
吳中齊雲樓

樓觀齊雲正霜明天淨一雁高飛江南倦客徙倚目斷雙溪凭闌自語算從來總是兒癡青鏡裏數絲點鬢問渠何事忘歸 幸有三椽茅屋更小園隨分秋實春菲幾多清風皎月美景良時陶賢樂聖儘由他歧路危機須信道功名富貴大都磨蟻醯雞

祝英臺近
送吳叔永文昌韻

碧雲開紅日麗宮柳碎繁影猶記朝回馬兀夢頻醒天教一舸江湖數椽澗壑漸擺脫世閒塵境 已深省添買竹塢千畦荷漪兩三頃鶴引禽伸日月嶠壺永不須甕裏思量隙中馳驚也莫管玉關風景

又和辛稼軒
寶釵分韻

霧霏霏雲漠漠新綠漲幽浦夢裏家山春透一犁雨傷心塞雁回
來問人歸未怎知道蝸名留住鏡中覷近年短髮難簪絲絲不
禁數蕙帳塵侵淒切共誰語被他輕暖輕寒將人憔悴正悶裏梅
花殘去

又

旋安排新捻合鶯谷共煙浦好處偏慳一向風和雨今朝捱得晴
明拖條藜杖一齊把春光黏住且閒覷水邊行過幽亭修竹淨
堪數百舌樓羅漸次般言語從今排日追游留連光景但管取籠
燈歸去

摸魚兒

滿園林瘦紅肥綠休休春事無幾杜鵑喚起三更夢窗外露澄風
細渾不寐但目看一簾夜月移花未推衾自起念歲月如流容顏
不駐鏡裏留無計人閒事休說賤貧富貴天公長把人戲蕭蕭
曹郭今何在空有舊聞千紙君謾試數青史榮名到底三無二浮

生似寄爭似得江湖煙蓑雨笠不被蝸蠅繫

喜遷鶯

良辰佳節閒底事十番九番爲客景物春妍鶯花日鬧自是情懷
今別只有思歸魂夢卻怕杜鵑啼歇消凝處正絲楊冉冉寸腸千
折謾說臨曲水修竹茂林人境成雙絕俯仰俱陳彭殤等幻何
計世殊時隔倚樓碧雲日暮漠漠遠山千疊沈醉好又城頭畫角
一聲聲咽

千秋歲

水晶宮裏有客閒游戲溪漾綠山橫翠柳舒陰不斷荷遞香能細
攲小艇受風多處披襟睡回首看朝市名利人方醉蝸角上爭
榮悴大都由命分枉了勞心計歸去也白雲一片秋空外

聲聲慢

和吳夢窗賦梅

挨晴拶暖載酒呼朋猶夷東圃西園綠萼枝頭兩三初破輕寒平
生自甘寂寞占冷妝不爲人妍林逋去問影疏香暗誰賦其閒
空想故山奇事正煙橫嶺曲月浸溪灣杏錯桃訛那時青子都圓

惟饒夢窗知處對翠禽依約神仙休引角怕征人淚落塞邊

青玉案

黃昏先自無情緒更幾陣風和雨閒把樓頭更點數挑殘燈燼裝
成香縷此際憑誰訴新詞舊曲歌還住欲說相思渺無處圍定
寒鑪人不語暗蛩啾唧征鴻嘹唳憔悴都如許

又和劉長翁
右司韻

人生南北如歧路惆悵方回斷腸句四野碧雲秋日暮葦汀蘆岸
落霞殘照時有鷗來去一杯渺渺懷今古萬事悠悠付寒暑青
箬綠蓑便野處有山堪采有溪堪釣歸計聊如許

江城子
示表姪
劉國華

家園十畝屋頭邊正春妍釀花天楊柳多情拂拂帶輕煙別館閒
亭隨分有時策杖小盤旋采山釣水美而鮮飲中仙醉中禪閒
處光陰贏得日高眠一品高官人道好多少事碎心田

鷓鴣天
和古樂府韻送游
景仁將漕夔門

去日春山淡翠眉到家恰好整寒衣人歸玉壘天應惜舟過松江

月半垂千萬緒兩三卮送君不忍與君違書來頻寄西邊訊是
我江南腸斷時

南柯子

池水凝新碧蘭花駐老紅有人獨立畫橋東手把一枝楊柳繫春
風鵲絆游絲墜蜂拈落葉空鞦韆庭院小簾櫳多少閒情閒緒
雨聲中

踏莎行

紅藥將殘綠荷初展森森竹裏閒庭院一鑪香燼一甌茶隔牆聽
得黃鸝囀陌上春歸水邊人遠盡將前事思量徧流光冉冉爲
誰忙小橋竚立斜陽晚

糖多令
湖口道中

白鷺立孤汀行人長短亭正垂楊芳草青青歲月盡拋塵土裏又
隔日是清明日暮碧雲生魂傷老淚橫算浮生較甚浮名萬事
不禁雙鬢改誰念我此時情

謁金門
甯上秀
邱溪亭

溪邊屋不淺不深團簇野樹平蕪秋滿目有人閒意足 旋喚一尊醺醺菱芡煮來新熟歸去來辭歌數曲醉時無檢束

又

東風惡一片梅花吹落獨上小樓閒渡索雲垂天四角 春自於人如昨人自於春難託惆悵光陰虛過卻情懷無處著

又

庭垂箔數點楊花飛落倚徧闌干人寂寞閒鋪碁一角 客裏春寒偏覺睡起春衫徧薄想得故山猿共鶴笑人身計錯

鵲橋仙

扁舟昨泊危亭孤嘯目斷閒雲千里前山急雨過溪來盡洗卻人閒暑氣 暮鴉木末落鳧天際都是一團秋意癡兒騃女賀新涼也不道西風又起

更漏子

柳初眠花正好又被雨催風惱紅滿地綠垂隄杜鵑和恨啼 對殘春消永晝乍暖乍寒時候人獨自倚危樓夕陽多少愁

海棠春郊行

天涯芳草迷征路還又是恩恩春去烏兔裏光陰鶯燕邊情緒雲梢霧末溪橋野渡盡是春愁落處把酒勸斜陽小向花閒駐

卜算子

春事到西湖處處梅花笑抖擻長安車馬塵眼底青山好 身世兩悠悠歲月閒中老極目煙波萬頃愁此意誰知道

又

若雪水能清更有人如水秋水橫邊簇遠山相對盈盈裏 溪上有鴛鴦艇子頻驚起何似收歸碧玉池長在闌干底

憶秦娥

嬌滴滴嬋娟影裏曾橫笛曾橫笛一聲腸斷一番愁織 隔牆頻聽無消息龍吟海底難重覓難重覓梅花殘了杏花消得

長相思

要相逢恰相逢畫舫朱簾脈脈中霎時煙靄重 怨東風笑東風落花飛絮兩無蹤分付與眉峯

案朱本此下原有長相思燕高飛及上簾鉤二首乃龍洲詞因刪去

柳梢青

攢步花茵穿簾柳絮堆地榆錢乍暖仍寒欲晴還雨春事都圓
午窗睡起厭厭屋角外初啼杜鵑百種淒涼幾般煩惱沒箇人憐

又

斷續殘虹翩飛去鳥別岸孤村傍水樓臺滿城鐘鼓又是黃昏
悠悠歲月如奔正目斷邊塵塞雲兩鬢秋風百年人事無限消魂

阮郎歸

輕風輕靄弄晴暉鶉鳩相應啼畫堂人靜畫簾垂闌干獨倚時
閒拾句困尋棊沈吟心是非茶蘼開徧柳花飛惜春春不知

訴衷情

幾回相見見還休說著淚雙流又聽畫角鳴咽都和作一團愁
雲似絮月如鉤憶凭樓蕙蘭情性梅竹精神長在心頭

霜天曉角

雲收霧闢萬里天空碧舟過蛾眉亭下景似舊人非昔 年事如
梭擲世事如棊弈撫掌扣舷一笑今古恨問誰得

點絳脣

禁鼓三敲參旗初挂闌干角淺屏疏箔夜氣侵衣薄 欸乃吳歌
艇子當溪泊休休莫五湖煙浪不是鷗夷錯

蝶戀花

吳中趙圖

野樹梅花香似撲小徑穿幽樂意天然足回首人閒名利局大都
一覺黃梁熟 別墅誰家屏簇簇綺戶疏窗尙有藏春屋鏡斷釵
分何處續傷心芳草庭前綠

又

枕夢回聞二鼓冷落青燈點滴空階雨一寸愁腸千萬縷更聽
切切寒蛩語 世事翻來還覆去造物兒嬉自古無憑據利鎖名
韁空自苦星星鬢影今如許

天仙子

舟行阻風

百舌搬春春已透長驛短亭芳草畫家山腸斷欲歸人風宿留船
津候一夜朱顏煩惱瘦 不用尋思閒宇宙倦鳥入林雲返岫小
園自有四時花鋪錦繡鍾醇耐儘勝疊疊懸印綬

如夢令

插徧門前楊柳又是清明時候歲月不饒人鬢影星星知否知否
知否且盡一杯春酒

又

昨日春衫初試今日春寒猶殢待得晚風收獨上危樓閒倚閒倚
閒倚目斷半空煙水

又

江上綠楊芳草想見故園春好一樹海棠花昨夜夢魂飛繞驚曉
驚曉窗外一聲啼鳥

又

樓外殘陽將暮江上孤帆何處搔首立東風又是少年情緒凝竚
凝竚一抹淡煙輕霧

又

枝上蝶紛紛蜂鬧幾樹杏花殘了幽鳥亦多情片片銜歸芳草休掃
休掃管甚落英還好

又

鎮日春陰漠漠新燕乍穿簾幕睡起不勝情閒拾瑞香花萼寂寞
寂寞沒箇人人如昨

又

庭院深深春寂還是他鄉寒食閒利與閒名謾把光陰虛擲虛擲
虛擲知道幾時歸得

又

閒向園林點檢又見小桃開徧切莫便飄零且爲春光留戀留戀
留戀待我持杯深勸

又

一餉園林綠就柳外鶯聲初透輕暖與輕寒又是牡丹花候花候
花候歲歲年年人瘦

又

雨過遠山如洗雲散落霞如綺嫩綠與殘紅又是一般春意春意
春意只怕杜鵑催裏

望江南

家山好好處是三春白白紅紅花面貌絲絲裊裊柳腰身錦繡底園林行樂事都付與閒人挈榼攜壺從笑傲踏青挑菜恣追尋贏得箇天真

又

家山好好是夏初時習習薰風回竹院疏疏細雨灑荷漪萬綠結成帷呼社友長日共追隨淪茗空時還酌酒投壺罷了卻圍棋多少得便宜

又

家山好好處是秋來綠橘黃橙隨市有巖花籬菊逐時開管領付尊壘新築就別館共閒臺搖手出離名利窟掉頭擺脫簿書堆只在念頭灰

又

家山好好處是三冬梨栗甘鮮輸地客魴鰠肥美獻溪翁醉滴小槽紅識破了不用計窮通下澤車安如駟馬市門卒穩似王公

一笑等雞蟲

又

家山好結屋在山椒無事琴書爲伴侶有時風月可招邀安樂更相饒伸腳睡一枕日頭高不怕兩衙催判事那愁五鼓趣趨朝此福要人消

又

家山好底事尙忘歸但我辭榮還避辱從渠把是卻成非跳出世關機將五十老相已相催爭得氣來有甚底更加官後亦何爲奉勸莫癡迷

又

家山好一室白雲中時喚道人談命蒂也呼和尙說禪宗孔佛老和同淘汰盡八面總玲瓏欲把捉時無把捉道虛空後不虛空且問主人公

又

家山好負郭有田園蠶可充衣天賜予耕能足食地周旋骨肉盡

團圓 旋五福歲歲樂豐年自養雞豚烹臘裏新抽韭薺薦春前
活計不須添

又

家山好有底尙縈牽馬後樂聽餘十載眼前赤看也多年滋味只
如然 身外事不用強探拈自古幾番成與敗從來百種醜和妍
細算不由賢

又

家山好好處是安居無事不須干郡縣有餘但管濟鄉閭及早了
王租 隨日力也著幾般書靜裏精神偏爽快閒中光景越舒徐
臘月盡工夫

又

家山好無事挂心懷早課畦丁勤種菜晚科園戶漫澆花祇此是
生涯 塵世裏擾擾正如麻散復聚來羶上蟻左還右旋壁間蝸
只爲那紛華

又

家山好百事儘如如渴飲飢餐都屬我倒橫直立總由渠更不要
貪圖 三徑裏恰好小茅廬種竹梅松爲老伴養龜猿鶴助清娛
扣戶有樵漁

又

家山好不是撰虛名世上盛衰常倚伏天家日月也虧盈退步是
前程 且恁地捲索了收繩六字五胡生口面三言兩語費顏情
贏得鬢星星

又

家山好凡事看來輕一壺儘由儂餽釘三才不欠你稱停有耳莫
閒聽 靜地裏點檢這平生著甚來由爲皎皎好無巴鼻弄醒醒
背後有人憎

浪淘沙

和吳夢窗
席上贈別

家在敬亭東老檜蒼楓浮生何必寄萍蓬得似滿庭芳一曲美酒
千鍾 萬事轉頭空聚散恩恩片帆穩挂曉來風別後平安眞信
息付與飛鴻